

Vischnaunca politica Vuorz

Radunonza communal dils 28.08.2009

1. Approbaziun dil protocol dalla radunonza communal dils 12.06.2009

Il protocol dalla radunonza communal dils 12.06.2009 vegn approbaus unanimamein.

2. Scaffir zona tempo 30 tras il vitg da Vuorz

La suprastonza communal less scaffir tras il vitg da Vuorz ina zona tempo 30. Intent da quella mesira ei da quietar il traffic e scaffir dapli segirtad pils pedunzs. Numnadamein s'extenda la vischnaunca sin ina lunghezia da ca. 1'500 meters suenter la via da colligiazion che sesparta dalla via principala H19 (denter La Punt e Mustér) e meina ad Andiastr. Tier tut quei sesanflan ils implonts/loghens cun dabia frequenza da personas sco la posta, la baselgia, il consum, las fermadas digl auto da posta eav. gest sper via. Plinavon sespartan numerusas gassas silla via da colligiazion, las qualas ein per part pauc surveseivlas.

La suprastonza communal ha incaricau il biro d'inschignier Monsch a Parpan cun l'elaboraziun d'in rapport, el qual ei denter auter vegniu examinau las spertadads mesiradas el decuors dils meins mars, avrel e fenadur. Sin fundament da quellas mesiraziuns ei vegniu fixau in tschancun tras il vitg nua la spertadad vegn limitada. Plinavon ei vegniu elaborau in'expertisa detagliada, la quala duei cuntener la basa per far la damonda alla cumissiun cantunala da spertadad. Tala vegn a tractar la damonda per mauns dalla Regenza.

La realisaziun dil present project sa vegnir calculada cun total frs. 16'000.00. En quella ei cumpriu la montascha da tablas mintgamai tier las entradas dil vitg sco era la signalisaziun enteifer il vitg.

Alla presenta radunonza communal ei signur Niccolo Hartmann dil biro d'inschignier Monsch presents. El presenta cuort il project en detagl e stat a disposiziun per damondas.

La suprastonza communal fa la proposta da scaffir ina zona tempo 30 tras il vitg da Vuorz. In conclus dalla radunonza communal ei in ulteriur argument per la cumissiun da spertadad per approbar la limitaziun da spertadad.

Ord miez dils vischins vegn il giavisch da spustar la tabla da 50 km/h all'entrada dil vitg per enzaconts meters pli engiu, gest avon la fermada digl auto da posta. Aschia savess la zona tempo 30 gia vegnir engrondida.

La radunonza communal concluda unanimamein d'introducir ina zona tempo 30. Medemamein fetg priu si contact culla polizia cantunala davart igl engrondiment dalla zona dil vitg cun spustar la tabla da 50 km/h engiuviars.

3. Approbaziun dalla revisiun parciala dalla planisaziun locala

Situaziun da partenza

La davosa planisaziun locala dalla vischnaunca da Vuorz datescha digl onn 1994. El decuors dils davos onns ha ei dau ina leva activitad da baghegiar. Tenor in'expertisa dil biro d'inschignier Cavigelli a Glion dat ei aunc dabia parcelas da baghegiar ch'ei buca surbaghegiadas. Ord quei motiv fetgi ina revisiun totala buca senn.

La presenta revisiun parciala dalla planisaziun locala cumpeggia las sequentas midadas:

Midada da zona dalla parcella nr. 206

La parcella nr. 206 a Scuein sesanfla actualmein en la zona ulteriur territori communal. Per saver ereger ils parcadis pretendi en connex culla lubientscha da baghegiar a Lidia Alig-Janki (Ustria Stiva Sulegl) sto ina part dalla parcella vegnir zonada entuorn ella zona per baghetgs e stabiliments annex. **La radunonza communal approbescha unanimamein quella midada.**

Midada da zona dalla parcella nr. 399

La parcella nr. 399 sesanfla actualmein en la zona ulteriur territori communal. Il proprietari, Gabriel Moritz, Neerach, giavischa da saver ereger parcadis sin tala parcella. Per quei intent sto la parcella vegnir zonada entuorn ella zona per baghetgs e stabiliments annex. **La radunonza communal approbescha unanimamein quella midada.**

Midada da zona dallas parcelas nr. 453 e nr. 791

Las parcelas nr. 453 a Clis e nr. 791 a Davos Chigiosch sesanflan actualmein en las zonas d'agricultura e zona forestala. La suprastonza communal ha previu da scaffir parcadis sin quellas parcelas. Ils parcadis el Clis sesanflan agl ur dil territori habitau, tals ein denton colligiai ideal cul centrum dil vitg. Ils parcadis a Davos Chigiosch sesanflan all'entschatta dil vitg. Tals ein previ sco pusseivladad da parcar, principalmein la stad, per visitaders dil casti Munt s. Gieri. **La radunonza communal approbescha unanimamein quella midada.**

En connex culs parcadis sillas parcelas nr. 453 e nr. 791 vegn fatg la proposta ord miez dils vischins dad affittar ils parcadis encunter indemnizaziun. La suprastonza communal duei elaborar ina proposta per l'utilisaziun da quels parcadis. **La proposta dils vischins vegn approbada cun 23 encunter 6 vuschs.**

Midada dil plan general d'avertura 1:5'000

Allas Pendicularas Breil-Vuorz-Andiast SA ei vegniu concediu igl onn 200X ina lubientscha per baghegiar la sutgera naven dall'Alp Dado entochen tier il Fil. Ensemen culla lubientscha da baghegiar ei vegniu lubiu ils indrezs tecnicos necessaris per far neiv artificiala (lontschas, lingias). Igl ei previu d'ennevar in toc dalla pista denter Plaun da Bots e Fil Alp Dado sin ina lunghezia da rodond 850 m, sin ina ladezia da ca. 30 m. **La midada dil plan general d'avertura 1:5'000 vegn approbada cun 22 vuschs encunter 1 vusch.**

Midada dil plan da zonas 1:5'000

Sill'Alp Dado e tier la staziun a val dil Fil ei previu da scaffir ina zona per indrezs turistics. Quella midada ei vegnida prida avon sin giavisch dallas Pendicularas Breil-Vuorz-Andiast SA, denton era per mantener quella biala tegia da lenn en possess da vischnaunca. **La midada dil plan da zonas 1:5'000 vegn approbada cun 22 encunter 5 vuschs.**

4. Zona da ruaus per selvaschinas a Con Ault

Il 22 d'october 2007 ha la Regenza GR approbau il "Plan da svilup Foppa/Rueun", il qual ei vegnius elaboraus sin fundament dad art. 27 dalla lescha forestala cantunala. La finamira dil plan da svilup sa vegnir descretta sco suonda:

Zitat: "Das Ziel der Waldentwicklungsplanung ist, die Waldnutzungen für die nächsten 20 Jahre zu regeln. Der Waldentwicklungsplan ist das Führungsinstrument des kantonalen Forstdienstes für die zielgerichtete und effiziente vorausschauende Steuerung der Waldpflege und Waldbewirtschaftung."

Sils plans corrispundents dil plan da svilup sura numnau ei vegniu scaffiu ina "zona da ruaus per uaul e selvaschina" a Con Ault. Agl ur dalla zona vegn tangau il Ladril sin territori da Vuorz (mira plan). Quellas zonas vegnan scaffidas per mantener ruaus el territori da viver d'unviern dallas selvaschinas e per reducir donns vid igl uaul. Duront in temps fixau dalla radunonza communal eis ei scumandau da passar e da carrar en quei territori. Plinavon ein tut las activitads dil carstgaun (viandar, ir cun skis eav.) scumandadas en quei territori.

La suprastonza communal fa la proposta, sin fundament dil plan da svilup e sin cussegliaziun digl Uffeci da catscha e pesca dil cantun Grischun, da decider davart la zona e da fixar il temps da scamond naven dils 20 da december entochen ils 30 d'avrel.

La radunonza communal approbescha unanimamein la zona da ruaus per selvaschinas cun fixar il temps da scamond naven dils 20 da december entochen ils 30 d'avrel.

5. Varia

Renovaziun stizun Volg: President Luzi Pfister orientescha ils presents ch'ils responsabels da nossa stizun dil vitg ei fetg satisfatgs dalla renovaziun fatga dacuort. Dapi l'avertura hagian ins saviu registrar pli aultas frequenzas e consequentamein in alzament dalla sviulta. Ei vegn appellau da far vinavon stediamein diever dalla stizun.

Renovaziun baselgia: President Luzi Pfister informescha davart la sanaziun dalla baselgia. Numnadamein fa el attents sin ina "sera dallas portas aviartas", la quala ha liug igl 1. da settember 2009 allas 18.00 uras - 20.00 uras.

Mirs schetgs Munt s. Gieri: President Luzi Pfister informescha ch'ina gruppa d'empredists da Wetzikon ha menau atras in'jamna da project a Breil. Duront quell'jamna ei ca. 40 dels stai involvai vid il project da construir daniev mirs schentgs el territori dil casti Munt s. Gieri.

Project da fusiun: Ord miez dils vischins vegn giavischau sclariment davart il tema fusiun. President Luzi Pfister sa informar che la suprastonza communal hagi concludiu da lantschar in project da fusiun cun las vischnaucas da Breil ed Andiast. La radunonza dad d'entellir ch'ins basegni medemamein indicaziuns davart in'eventuala fusiun cun Glion, per aschia saver cumparegliar las duas variantas da fusiun.

Vuorz, ils 28.08.2009

Il president:

Igl actuar:

Luzi Pfister

Giovanni Damiano